

Lockerbieko susmagarriak entregatuko ditu Gaddafik



Libiak ontzat jo ditu Mandela eta Fahd erregearen garantiak

Agentziak / Kairo

Muammar el Gaddafi Libiako agintariak hitza eman du Lockerbieko atentatuko bi susmagarriak entregatuko dituela apirilaren 6rako. Atentatua 1988ko abenduaren 21ean gertatu zen, Eskoziako Lockerbie herria zeharkatzen ari zen hegazkin batek eztanda egin zuenean. 259 bidaiari eta 11 herritar hil ziren leherketan.

MUAMMAR EL GADDAFI Libiako agintariak Nelson Mandela Hego Afrikako lehendakariarekin zuzenean hitz egin zuen atzo, eta telefonoz mintzatu zen Saudi Arabiako printze oinordeko Abdala Bin Abdel Aziz. Ondoren, Gaddafik hitza eman zuen nazioarteko justiziaren esku utziko dituela Lockerbieko atentatua egiteagatik susmagarri diren bi libiarrak: Abdel Basset Ali al-Megrahi eta Lamén Khalifa Fhima.

Gaddafik komunikatu bat kaleratu zuen atzo Tripolin (Libia), eta hor adierazi zuen Mandelak beharrezko bermeak eman dizkiola «bi susmagarriak Holandan epaituko dituztela ziurtatzeko». Libiako Herriaren Kongresu Nagusian ere, Legebiltzarrean, hitz egin zuen Gaddafik, eta esan zuen nahikoa zitzaiola «Mandela, Fahd erregea eta Abdala printze oinordekoaren garantiakin».



Lamén Khalifa Fhima eta Abdel Basset Ali al-Megrahi, bi susmagarriak.

Holandan epaituko dituzte susmagarriak

Geroago, Mandelak Libiako politikoen aurrean esan zuen Gaddafik Kofi Annan Nazio Batuetako idazkari nagusiari azalduko ziola susmagarriak Holandaren esku utziko dituela Holandako epaitegi batek, Eskoziako legeak aintzat hartuta epai ditzan.

Mandelak geroago argitu zuenez, hori zioen gutuna eskuartean zuen berak. «Saudi Arabiako Fahd erregeak eta nik neuk dugu erabaki horren erantzukizuna, eta Annani jakinaraziko diogu apirilaren 6rako», azpimarratu zuen Hego Afrikako presidentek.

Mandelak bere eta Saudi Arabiaren «ohorea» aipatu

zituen EEBBen, Erresuma Batuen eta Nazio Batuetako Segurtasun Kontseiluaren «fede onaren» adierazgarri.

Atentatua 1988ko abenduaren 21ean gertatu zen. Londresko (Erresuma Batua) aireportutik abiatu eta New Yorkera (EEBB) zihoan Pan Am konpainiako hegazkin batek eztanda egin zuen Eskoziako Lockerbie herria zeharkatzen ari zenean.

Leherketaren ondoren behera erori zen, eta hegazkinen zihoazen 259 bidaiariek gain herriko 11 bizilagun hil ziren.

Atentatuak krisia sortu zuen Erresuma Batua, EEBBak eta Libia artean, lehen bi herrialdeek bigarrenari leporatu baitzieten atentatuarekin zerikusia izatea.

Zazpi urteko zigorren ondoren

HEGO AFRIKA eta Saudi Arabiak bitarteko lanak egin dituzte Libiarekin, atentatuaren bi susmagarriak entrega zitzan konbentzitzeko.

Libiari zigor ekonomiko, diplomatiko eta militarrek ezarri zizkieten Nazio Batuek 1992an, susmagarriak EEBBak edo Erresuma Batuko justiziaren esku utzi nahi ez zituelako.

Susmagarriak hirugarren herri batean epaitzea eskatu zuen Libiak. Iazko abuztuan EEBBak eta Erresuma Batua ados azal-

du ziren Lockerbieko atentatuaren bi susmagarriak Holandako epaitegi batek epai zitzan, baina Eskoziako legeak kontuan izanda.

Nazio Batuek prest azaldu ziren zigorrak kentzeko baldin eta susmagarriak entregatzen bazituen. Libiak orduan garantia batzuk eskatu zituen.

EEBBak eta Erresuma Batuek hilaren amaierako epea eman zien Libiari susmagarriak entregatzeko, bestela zigorrak zorrotzko zitzaizkiola mehatxu eginenez.

Gutxienez 150 zibil hil dituzte Aljerian hila hasi zenetik, ustez talde islamikoek

■ *Islamiko armatuek atentatuak ugaritu dituzte apirileko hauteskundeei begira*

Agentziak / Aljer

USTEZ talde armatu islamikoek gutxienez 150 pertsona hil dituzte hila hasi zenetik, iturri batzuen arabera. Segurtasun zerbitzuek egingandako komunikatu eta atentatuetatik bizirik irtendako lekukoen datuetatik atera dira ondorio horiek.

Ustezko islamista armatuen azken atentatua herenegun gauean gertatu zen Ain Defla probintzian, Aljerdik hegoaldera. Komando batek kontrol postu faltsu bat jarri

zuen errepidean, eta hamar bidaiari geldiarazi. Guztiak hil zituzten, eta ondoren babeslekuetara egin zuten ihes.

Segurtasun indarrek ustezko hiltzaileak harrapatzeko operazioa abiarazi zuten berehala. Hala ere, ez zen zehaztu komandoko kideak harrapatu ote zituzten.

Aurreko hilketa hilaren 13an gertatu zen. Ustez islamistek sei zibil hil zituzten Tipaza eskualdean, Aljerdik ekialdera. Bi egun geroago sei zibil hil zituzten Blidan.

Atentatuak ugaritu egin dira azken aldian Aljerian. Lehendakari berria aukeratzeko hauteskundeak egingo dira apirilaren 15ean, eta horretaz baliatuta ekintzak ugaritu dituzte propaganda gisa.

Atentatuak gehitzearekin batera, talde armatu islamikoaren aldeko orriak banatzen dituzte herrietan. Talde islamiko armatuek bizilagunak mehatxatzen dituzte, esanez hil egingo dituztela botoa emateko hauteskontzietara inguratuz gero.